

ԲԱՅ ՆԱՄԱԿ

ՀՀ գիտությունների ազգային ակադեմիայի նախագահ արև Ռադիկ Մարտիրոսյանին

2008թ. հոկտեմբերից մինչև օրս Ձեզ հասցեագրած իմ դիմումներն ու դիմում-բողոքները մնացին անպատասխան:


2011թ. ապրիլի 4-ին և մայիսի 6-ին կրկին դիմումներ ներկայացրի այն խնդրի մասին, ինչ տեղի էր ունեցել Ձեր համակարգի Արվեստի ինստիտուտում: Կերջին երկու դիմումներն էլ կրկին մնացին անպատասխան: Ավելացնեմ, որ դիմումին պատասխանելը օրենք է, դա քաղաքացու սահմանադրական իրավունքն է և առավել ևս՝ ղեկավարի պարտականության ու վերաբերմունքի չափանիշ: Դուք իմ դիմումի վրա մակագրել եք կցել գործին: Տեղյակ եմ պահում, որ ես Ձեր համակարգում չեմ աշխատում և անձնական գործ չունեմ: Պարզվեց, որ այդ դիմում-բողոքը Ձեր հանձնարարությանը և մակագրությանը կցվել է ընդհանուր բաժնի դիմումների թղթապանակում պահվող նյութերին: Չէ՛ որ արխիվային այդ փաստաթղթերը սերունդները կարդալու են. ի՞նչ կմտածեն ձեր մակագրությունների և դիմումներն անպատասխան թողնելու մասին:

Կարծում եմ՝ Ձեր պարտքն էր դիմումին արձագանքել և, որ տրվեր պատասխան: Բայց քանի որ դուք պատասխան չունեք, այդ պատճառով էլ դիմումներն ուղարկվեցին արխիվ: Այժմ ստիպված եմ հանրությանը լրատվության միջոցներով ներկայացնել դիմումներում բարձրացված հարցերը, որին դուք լավ ծանոթ եք:

2008թ. հոկտեմբերի 30-ին Արվեստի ինստիտուտի 016 աստիճանաշնորհող խորհրդում տեղի ունեցավ «Չարենցը և արվեստը» թեմայով իմ դոկտորական ատենախոսության պաշտպանությունը: Պաշտպանությունից հետո երեք ժամ տևած քվեարկության արդյունքում պարզվեց, որ խորհրդի 13 անդամներից ինձ ձայն են տվել 8-ը, 2 քվեաթերթիկ ճանաչվել է անվավեր, իսկ խորհրդի 3 անդամներ դեմ են քվեարկել: Ես կորցրի (0,5 կես) ձայն, և խորհուրդը չհաստատեց պաշտպանությունը:

Պաշտպանությունից հետո պարզվեց, որ Աննա Ասատրյանը (գիտ. թեկնածու) խորհրդի անդամ չէր, բայց մասնակցել է խորհրդին, դարձել ձայներ հաշվող հանձնախմբի անդամ, դեմ քվեարկել և կեղծել 2 քվեաթերթիկ: Իմ բողոքների և կեղծիքների հիման վրա, Ձեր առաջարկությամբ ԲՈՂ-ի նախագահությունը 2008թ. դեկտեմբերի 19-ին լուծարեց 016 աստիճանաշնորհող խորհուրդը առանց պատժելու մեղավորներին և ոչ էլ օգնելու տուժողին:

Դուք որպես ԲՈՂ-ի խորհրդի անդամ՝ իրավունք ունեիք ըստ կանոնակարգի «Որակավորման գործի քննարկումը ԲՈՂ-ում» բաժնի 33-րդ կետի համաձայն՝ առաջարկել նաև բեկանելու գիտական աստիճաններ շնորհող խորհրդի որոշումը, իսկ 34-րդ կետի համաձայն, եթե նկատվել են կանոնակարգի խախտումներ, ապա ԲՈՂ-ը աշխատանքը վերադարձնում է խորհուրդ կրկնակ քննարկման ու քվեարկության: Սակայն այդ քայլին չդիմեցիք: Ձեզ հասցեագրված իմ դիմումում առաջարկել էի որպես թյուրիմացություն դուրս հանել Աննա Ասատրյանի կողմից կատարված կեղծիքը և փոխել եզրակացությունը: Այդ պայմաններում խորհրդի 12 անդամներից իմ օգտին քվեարկած 8 ձայնը լիարժեք էր իմ դոկտորա-



PHOTOURE

կան ատենախոսությունը հաստատելու համար: Ես փորձեցի Ձեր միջոցով և խաղաղ ճանապարհով շտկելու թույլ տված կեղծիքներն ու խարդախությունները: Սակայն դուք պաշտպանեցիք կեղծիքն ու անագնավությունը, շարունակեցիք հովանավորել նրանց: Աշխարհի որևէ երկրի գիտական խորհրդում նախադեպը չունեցող այդպիսի փաստ չի արձանագրվել: Եթե այստեղ այդ անթույլատրելի փաստը կատարվել է, փորձեք ուղղել: Մի՞թե Աննա Ասատրյանի ներգործության դաշտն այնքան հզոր է, որ անհնար է շտկել նրա և ղեկավարի թույլ տված սխալները: Ինչպե՞ս կարելի է հրապուրվել ցամաքած աղբյուրով:

Ազգային ակադեմիայում չկա գիտական մթնոլորտ: Այնտեղ իշխողը բիզնեսն է: Հանրապետության նախագահը, Ազգային ժողովը, Կրթության և գիտության նախարարությունը պայքարում են կաշառքի ճանապարհով գիտնականների թիվն ավելացնելու դեմ, սակայն արված քայլերն օգուտ չեն տալիս, ամեն ինչ նույնն է և շարունակելի: Ձեզ իմ ընծայագրով ուղարկված քննադատական հինգ գրքերը ասված փաստերի վկայագրերն են: Իմ քննադատական ու հրապարակախոսական հրատարակումները երբեք անձնական չեն եղել և չեն լինելու: Այն, ինչ ես տեսնում, զգում և գրում եմ, փորձեք որպես գիտնականի զգալ ձեր մաշկի վրա, մի պահ Ձեզ պատկերացրեք իմ տեղը: Հավատացած եմ, ավելի խիստ մեթոդների կդիմեիք: Փաստորեն ինձ ստիպում եք դիմել ավելի խիստ չարագործությունների:

Ցանկացած խնդրի պետք է տրամաբանական լուծում տալ, որն է Ձեր լուծումը անտեսել մարդուն, քաբցնել նրա նկատմամբ թույլ տված կեղծիքները, արհամարիել դիմումի հեղինակին, չպատասխանել առաջ քաշած հարցերին: Եթե հանդուրժում եք կեղծիքն ու հովանավորում կեղծարարներին, ուրեմն լուրջ փորձություններ ունենք:

Գիտության և արվեստի ոլորտում ամեն հեռացող պետք է խիստ անհանգստանա և նպաստի նոր եկողներին: Այս ոլորտում չարությունն ու նախանձը հակամարդկային է: Մարդիկ պետք է իրենց գործած մեղքերի համար վճարեն: Հայրենի երկրի, հողի, գիտության ու մշակույթի պաշտպանության համար մենք պարտականություններ ունենք, որն էլ պարտավորեցնում է մեզ պայքարել խարդախությունների ու կեղծիքների դեմ:

Ես սպասում եմ ազնիվ ու ճիշտ պատասխանի:

Հարգանքներով
ՌԱԲԵՐՏ ԴԱՎԹՅԱՆ
22.06.2011թ.